

水經注釋卷三十四

仁和趙一清誠夫錄

江水二

又東過巫縣南鹽水從縣東南流注之

江水又東烏飛水注之水出天門郡澠中縣界北流逕建平郡沙渠縣南又北流逕巫縣南西北歷山道三百七十里注于江謂之烏飛口江水又東逕巫縣故城南縣故楚之巫郡也秦省郡立縣以隸南郡吳孫休分爲建平郡治巫城城緣山爲墉周十二里一百一十步東西北三面皆帶傍深谷南臨大江故謂之夔國也江水

水經注釋

卷三十四
江水二

一 東潛趙氏定本

又東巫溪水注之溪水導源梁州晉昌郡之宜漢縣東又南逕建平郡秦昌縣南又逕北井縣西東轉歷其縣北水南有鹽井井在縣北故縣名北井建平一郡之所資也鹽水下通巫溪溪水是兼鹽水之稱矣溪水又南屈逕巫縣東縣之東北三百步有聖泉謂之孔子泉其水飛清石穴潔並高泉下注溪水溪水又南入于大江江水又東逕巫峽杜宇所鑿以通江水也郭仲產云按地理志巫山在縣西南而今縣東有巫山將郡縣居治無恒故也江水歷峽東逕新崩灘此山漢和帝永元十二年崩晉太元二年又崩當崩之日水逆流百餘里湧

起數十丈今灘上有石或圓如篔或方似屋若此者甚衆皆崩崖所隕致怒湍流故謂之新崩灘其頽巖所餘比之諸嶺尚爲竦桀其下十餘里有大巫山非唯三峽所無乃當抗峰岷峨借嶺衡疑其翼附羣山並槩青雲更就霄漢辨其優劣耳神孟涂所處山海經曰夏后啟之臣曰孟涂是司神于巴巴人訟于孟涂之所其衣有血者執之是請生居山上在丹山西郭景純云丹山在丹陽屬巴丹山西卽巫山者也又帝女居焉宋玉所謂天帝之季女名曰瑤姬未行而亡封于巫山之陽一清按李善高唐賦注引襄陽耆舊傳曰赤帝女姚姬未行而亡葬于巫山之陽精魂爲草實爲靈

水經注釋

卷三十四 江水二

二 東潛趙氏定本

芝所謂巫山之女高唐之岨且爲行雲暮爲行雨朝朝暮暮陽臺之下且早視之果如其言故爲立廟號朝雲焉其間首尾一百六十里謂之巫峽蓋因山爲名也自三峽七百里中兩岸連山略無闕處重巖疊嶂隱天蔽日自非停午夜分不見曦月至于夏水襄陵沿泝阻絕或王命急宣有時朝發白帝暮到江陵其間千二百里雖乘奔御風不似疾也春冬之時則素湍淩潭迴清倒影絕巘多生檉柏一清按御覽引此文作怪柏懸泉瀑布飛漱其間清榮峻茂良多趣味每至晴初霜旦林寒澗肅常有高猿長嘯屬引淒異空谷傳響哀轉久絕故漁者歌曰巴

東三峽巫峽長猿鳴

按寰宇記作清猿

三聲淚沾裳江水又東

逕石門灘灘北岸有山山上合下開洞達東西緣江步
路所由劉備為陸遜所破走逕此門追者甚急備乃燒
鎧斷道孫桓為遜前驅奮不顧命斬上夔道截其要徑
備踰山越險僅乃得免忿恚而嘆曰吾昔至京桓尚小
兒而今迫孤乃至于此遂發憤而薨矣

又東過秭歸縣之南

縣故歸鄉地理志曰歸子國也樂緯曰昔歸典叶聲律
宋忠曰歸即夔歸鄉蓋夔鄉矣古楚之嫡嗣有熊摯者
以癡疾不立而居于夔為楚附庸後王命為夔子春秋

水經注釋

卷三十四
江水二

三 東潛趙氏定本

僖公二十六年楚以其不祀滅之者也袁山松曰屈原
有賢姊聞原放逐亦來歸喻令自寬全鄉人冀其見從
因名曰秭歸即離騷所謂女嬃嬋媛以詈余也縣城東
北依山即坂周回二里高一丈五尺南臨大江古老相
傳謂之劉備城蓋備征吳所築也縣東北數十里有屈
原舊田宅雖畦堰縻漫猶保屈田之稱也縣北一百六
十里有屈原故宅累石為屋基名其地曰樂平里宅之
東北六十里有女嬃廟擣衣石猶存故宜都記曰秭歸
蓋楚子熊繹之始國全氏曰按既曰熊繹之始國則非熊摯附庸所居矣自相參辰何也
而屈原之鄉里也原田宅于今具存指謂此也江水又

東逕其城北城憑嶺作固二百一十步夾谿臨谷據山
枕江北對丹楊城城據山跨阜周八里二百八十步東
北兩面悉臨絕澗西帶亭下溪南枕大江嶮峭壁立信
天固也楚子熊繹始封丹陽之所都也地理志以爲吳
之丹楊論者云尋吳楚悠隔縵縷荆山無容遠在吳境
是爲非也一清按班志此文在丹陽郡丹陽縣下然觀
子革僻處荆山之語則枝江爲近酈氏故辭
而闕又楚之先王陵墓在其間蓋爲徵矣江水又東南

水經注釋

卷三十四
江水二

四 東潛趙氏定本

城後疾移此蓋夔徙也

全氏曰熊摯不得爲熊
釋後故封夔非自巫徙春秋左

傳僖公二十六年楚令尹子玉滅夔者也服虔曰在巫
之陽秭歸歸鄉矣江水又東逕歸鄉縣故城北袁山松
曰父老傳言原旣流放忽然暫歸鄉人喜悅因名曰歸
鄉抑其山秀水清故出儁異地嶮流疾故其性亦隘詩
云惟嶽降神生甫及申信與余謂袁山松此言可謂因
事而立證恐非名縣之本旨矣縣城南面重嶺北背大
江東帶鄉口溪溪源出縣東南數百里西北入縣逕狗
峽西峽崖龕中石隱起有狗形形狀具足故以狗名峽
鄉口溪又西北逕縣下入江謂之鄉口也江水又東逕

信陵縣南臨大江東徬深溪溪源北發梁州上庸縣界南流逕縣下而注于大江也

又東過夷陵縣南

江水自建平至東界峽盛宏之謂之空泠峽峽甚高峻卽宜都建平二郡界也其間遠望勢交嶺表有五六峰參差互出上有奇石如二人像攘袂相對俗傳兩郡督郵爭界於此宜都督郵厥勢小東傾議者以爲不如也江水歷峽東逕宜昌縣之插竈下江之左岸絕岸壁立數百丈飛鳥所不能棲有一火燼插在崖間望見可長數丈父老傳言昔洪水之時人薄舟崖側以餘燼插之

水經注釋

卷三十四
江水二

五 東潛趙氏定本

巖側至今猶存故先後相承謂之插竈也江水又東逕流頭灘其水竝峻激奔暴魚鼈所不能游行者常苦之其歌曰灘頭白勃堅相持倏忽淪沒別無期袁山松曰自蜀至此五千餘里下水五日上水百日也江水又東逕宜昌縣北分夷道很山所立也縣治江之南岸北枕大江與夷陵對界宜都記曰渡流頭灘十里便得宜昌縣也江水又東逕狼尾灘而歷人灘袁山松曰二灘相去二里人灘水至峻峭南岸有青石夏沒冬出其石嶽崱數十步中悉作人面形或大或小其分明者鬚髮皆具因名曰人灘也江水又東逕黃牛山下有灘名曰黃牛

灘南岸重嶺疊起最外高崖間有石色如人負刀牽牛人黑牛黃成就分明既人跡所絕莫得究焉此巖既高加以江湍紆迴雖途經信宿猶望見此物故行者謠曰朝發黃牛暮宿黃牛三朝三暮黃牛如故言水路紆深迴望如一矣江水又東逕西陵峽宜都記曰自黃牛灘東入西陵界至峽口一百許里山水紆曲而兩岸高山重嶂非日中夜半不見日月絕壁或千許丈其石彩色形容多所像類林木高茂略盡冬春猿鳴至清山谷傳響泠泠不絕所謂三峽此其一也山松言常聞峽中水疾書記及口傳悉以臨懼相戒曾無稱有山水之美也及余來踐齋此意既至欣然始信耳聞之不如親見矣其疊嶂秀峰奇構異形固難以辭敘林木蕭森離離蔚蔚乃在霞氣之表仰矚俯映彌習彌佳流連信宿不覺忘返目所履歷未嘗有也既自欣得此奇觀山水有靈亦當驚知己于千古矣江水歷禹斷江南峽北有七谷村兩山間有水清深潭而不流又耆舊傳言昔是大江及禹治水此江小不足瀉水禹更開今峽口水勢并衝此江遂絕于今謂之斷江也江水出峽東南流逕故城洲洲附北岸洲頭曰郭洲長二里廣一里上有步闡故城方圓稱洲周回略滿故城洲上城周一里吳

水經注釋

卷三十四

江水二

六 東潛趙氏定本

西陵督步騭所築也孫皓鳳凰元年騭息闡復爲西陵
督據此城降晉晉遣太傅羊祜接援未至爲陸抗所陷
也江水又東逕故城北所謂陸抗城也城卽山爲墉四
面天險江南岸有山孤秀從江中仰望壁立峻絕袁山
松爲郡嘗登之矚望焉故其記云今自山南上至其嶺
嶺容十許人四面望諸山略盡其勢俯臨大江如縈帶
焉視舟如鳧雁矣北對夷陵縣之故城城南臨大江秦
令白起伐楚三戰而燒夷陵者也應劭曰夷山在西北
蓋因山以名縣也王莽改曰居利吳黃武元年更名西
陵也後復曰夷陵縣北三十里有石穴名曰馬穿嘗有

水經注釋

卷三十四
江水二

七
東潛趙氏定本

白馬出穴食人逐之入穴潛行出漢中漢中人失馬亦
嘗出此穴相去數千里袁山松言江北多連山登之望
江南諸山數十百里莫識其名高者千仞多奇形異勢
自非烟塞雨霽不辨見此遠山矣余嘗往返十許過正
可再見遠峰耳江水又東逕白鹿巖沿江有峻壁百餘
丈援所不能遊有一白鹿陵峭登崖乘巖而上故世名
此巖爲白鹿云江水又東歷荆門虎牙之間荆門在南
上合下開闔徹山南有門像虎牙在北石壁色紅間有
白文類牙形並以物像受名此二山楚之西塞也水勢
急峻故郭景純江賦曰虎牙桀豎以屹峩荆門鬪竦而

盤薄圓淵九迴以懸騰溢流雷响而電激者也漢建武十一年公孫述遣其大司徒任滿翼江王田戎將兵數萬據嶮為浮橋橫江以絕水路營壘跨山以塞陸道光武遣吳漢岑彭將六萬人擊荆門漢等率舟師攻之直衝浮橋因風縱火遂斬滿等矣

又東南過夷道縣北夷水從很山縣南東北注之

夷道縣漢武帝伐西南夷路由此出故曰夷道矣王莽更名江南桓溫父名夔改曰西道魏武臨江分南郡置臨江郡劉備改曰宜都郡治在縣東四百步故城吳丞相陸遜所築也為二江之會也

全氏曰按夷水別名清江其入江也有涇渭之

水經注釋

卷三十四
江水二

八 東潛趙氏定本

分故曰二江之會

北有湖里淵淵上橘柚蔽野桑麻闡日西望

很山諸嶺重峰疊秀青翠相臨時有丹霞白雲遊曳其上城東北有望堂地特峻下臨清江遊矚之名處也縣北有女觀山厥處高顯回眺極目古老傳言昔有思婦夫官於蜀屢愆秋期登此山絕望憂感而死山木枯悴鞠為童枯鄉人哀之因名此山為女觀焉葬之山頂今孤墳尚存矣

又東過枝江縣南沮水從北來注之

江水又東逕上明城北晉太元中苻堅之寇荊州也刺史桓沖徙渡江南使劉波築之移州治此城其地夷敞

北據大江江沱枝分東入大江縣治洲上故以枝江爲稱地理志曰江沱出西南東入江是也其民古羅徙羅故居宜城西山楚文王又徙之于長沙今羅縣是矣縣西三里有津鄉津鄉里名也春秋莊公十九年巴人伐楚楚子禦之大敗于津應劭曰南郡江陵有津鄉今則無聞矣郭仲產云尋楚禦巴人枝江是其塗便此津鄉殆卽其地也盛宏之曰縣舊治沮中後移出百里洲西去郡一百六十里縣左右有數十洲縈布江中其百里州最爲大也中有桑田甘果映江依洲自縣西至上明東及江津其中有九十九洲楚諺云洲不百故不出王

水經注釋

卷三十四
江水二

九 東潛趙氏定本

者桓元有問鼎之志乃增一洲以充百數僭號數旬宗滅身屠及其傾敗洲亦消毀今上在西忽有一洲自生

沙流迴薄成不淹時其後未幾龍飛江漢矣日知錄曰凡引用前人

人之言必用前文水經注引盛宏之荆州記所指今上則南宋文帝以宜都王卽帝位之事古人不以爲嫌

縣東二里有縣人劉凝之故宅凝之字志安兄盛公高尚不仕凝之慕老萊嚴子陵之爲人立屋江湖非力不食妻梁州刺史郭詮女亦能安貧宋元嘉中夫妻隱于衡山終焉不返矣縣東北十里土臺北岸有迤洲長十餘里義熙初烈武王斬桓謙處縣東南二十里富城洲上有道士范儕精廬自言巴東人少遊荆土而多盤桓

縣界惡衣麤食蕭散自得言來事多驗而辭不可詳人心欲見歛然而對貌言尋求終弗遇也雖逕跨諸洲而舟人未嘗見其濟涉也後東遊廣陵卒于彼土儕在洲無定止處宿憩一小菴而已弟子慕之於其昔遊共立精舍以存其人縣有陳留王子香廟頌子香于漢和帝之時出為荊州刺史有惠政天子徵之道卒枝江亭中常有三白虎出入人間送喪踰境百姓追美甘棠以永元十八年立廟設祠刻石銘德號曰枝江白虎王君其子孫至今猶謂之為白虎王江水又東會沮口楚昭所謂江漢沮漳楚之望也

水經注釋

卷三十四 江水二

十 東潛趙氏定本

又南過江陵縣南

縣北有洲號曰枚迴洲

全氏曰或云枝江所迴繞故亦曰枝迴

江水自此

兩分而為南北江也

禹貢錐指曰袁中道澧遊記曰鄴道元注水經于江陵枝迴州下有

南北江之名南江即江水由澧入洞庭者也陵谷變遷今之大江始獨專其澎湃而南江之跡稍稍湮滅僅為衣帶細流然江水會澧故道猶可考云小修此義最為精覈水經注澧水自石門以西與導江無涉其南江會澧故道參以近志東入洞庭此導江東至于澧過九江至于東陵之故道也一清按水經及注則是澧水注江非江會澧所北江有故鄉洲元興之末桓元西奔毛祐云略有差錯

之與參軍費恬射元于此洲元子昇年六歲輒拔去之

王韶之云元之初奔也經日不得食左右進粗粥咽不

下昇抱元胸撫之元悲不自勝至此益州都護馮遷斬

元於此洲斬昇於江陵矣下有龍洲洲東有寵洲二洲之閒世擅多魚矣漁者投罟歷網往往維絕有潛客泳而視之見水下有兩石牛嘗爲罟害矣故漁者莫不擊浪浮舟鼓枻而去矣其下謂之邠里洲洲有高沙湖湖東北有小水通江名曰曾口江水又東逕鸞尾洲北合靈溪水水無泉源上承散水合成大溪南流注江江溪之會有靈溪戍背阿面江西帶靈溪故戍得其名矣江水東得馬牧口江水斷洲通會江水又東逕江陵縣故城南禹貢荆及衡陽惟荆州蓋卽荆山之稱而制州名矣故楚也子革曰我先君僻處荆山以供王事遂遷紀

水經注釋

卷三十四
江水二

十一
東潛趙氏定本

郢今城楚船官地也春秋之渚宮矣秦昭襄王二十九年使白起拔郢郢以漢南地而置南郡焉周書曰南國名也南氏有二臣力均勢敵競進爭權君弗能制南氏用分爲二南國也按韓嬰敘詩云其地在南郡南陽之閒呂氏春秋所謂禹自塗山巡省南土者也是郡取名焉後漢景帝以爲臨江王榮國王坐侵廟垣地爲宮被徵升車出北門而軸折父老竊流涕曰吾王不還矣自後北門不開蓋由榮非理終也漢景帝二年改爲江陵

縣全氏曰秦置南郡卽治江陵高帝元年改郡名曰臨江以封共敖而本表曰都江陵高帝五年復曰南郡景帝二年又曰臨江郡以封子榮中二年復爲南郡蓋郡名有更易縣名無改移注非是王莽更名

南順縣曰江陸舊城關羽所築羽北圍曹仁呂蒙襲而據之羽曰此城吾所築不可攻也乃引而退杜元凱之攻江陵也城上人以瓠繫狗頸示之元凱病瘳故也及城陷殺城中老小血流沾足論者以此薄之江陵城地東南傾故緣以金堤自靈溪始桓溫令陳遵造遵善於方功使人打鼓遠聽之知地勢高下依傍創築略無差矣城西有栖霞樓俯臨通隍吐納江流城南有馬牧城西側馬徑此洲始自枚迴下迄於此長七十餘里洲上有奉城故江津長所治舊主度州郡貢於洛陽因謂之奉城亦曰江津戍也戍南對馬頭岸昔陸抗屯此與羊

水經注釋

卷三十四
江水二

十一
東潛趙氏定本

祐相對大宏信義談者以爲華元子反復見于今矣北對大岸謂之江津口故洲亦取名焉江大自此始也家語曰江水至江津非方舟避風不可涉也故郭景純曰濟江津以起漲言其深廣也江水又東逕郢城南子囊遺言所築城也地理志曰楚別邑故郢矣王莽以爲郢亭城中有趙臺卿冢岐平生自所營也冢圖賓主之容用存情好敘其宿尚矣江水又東得豫章口夏水所通也西北有豫章岡蓋因岡而得名矣或言因楚王豫章臺名所未詳也

水經注釋卷三十四終